

Natur erliewen an der Schoul.

„Ob Sonn, ob Reen, ob Wand“...

Triny Gorza

Naturpädagogin und Kindergärtnerin

„Frischlucht für Stubenhocker“, „Kindergärten in die Natur“, „école verte“, „vivre la nature avec les enfants“, „Waldkindergärten-die grüne Alternative“, „Waldpädagogik, neue Wege in der Naturerziehung“, „Hallo Erde, wir sind da!“, „Wald verstehen-Wald erleben“....„Natur erliewen an der Schoul“, „Ob Sonn, ob Reen, ob Wand“...

Vill Titelen, alleguerte soen se eis: ech erliewen, begräifen, versiche meng Welt ze verstoen, ech als ganze Mënsch, mat all menge Fähigkeeten, menge Sënner an och mat menge Schwächen.

Sou ass et bei eis zu Lorentzweiler net anescht; zënter 4 Joer ginn eis Spillschoulskanner all Woch 1 Mueren eraus an d’Natur, a fir all Saison verlosse mir eise Kllassesall e ganzen Dag.

Lo hu mir déi schwéier kal Zäit vum Wanter gepackt a mir fréen eis iwwert d’Fréijor. „D’Natur erwächt“, „Fräsche, Bruck a Kauzekäp“, „Fréijorsblumen“, „De Bam am Fréijor“ dat sinn eis Themen.

Hu Dir och schon d’Fréijor gericht? Leeft Iech d’Saaf am Mond zesummen, wann Dir u Bettseecheschalot denkt? An da könnt do dee wonnerbare Parfum vun de Veilercher an d’Nues....alles Erënnerungen un eng Kannerzäit, déi bleiwen!!!

De Muereskrees stëmmt eis op d’Thema „Mir richen d’Fréijor“ an: mir zéien déi frësch Fréijorsloft déif an eis eran, mir schnupperen, mir schäffen d’Loft mat den Hänn, mir otmen an a blose fest eraus.

Wei richt dann d’Fréijor? Mir sammeln a klunge Glieder frëscht Gras, Gréngs vun der Pissblumm, Blumeblieder vun der Bëschanemon a vun der Veilchen, nei Blieder vun Hielender, Huesebrout, Brennessels-

blieder a Bëschbuedem. Déi éischt Aufgab ass erleedegt, et huet Spaass gemeet zesummen ze sichen an ze plécken. Lo ass et Zäit fir eis Schmier z’iessen an duerno gëtt gespilt, gewullt, geklotert, gelaf, gerascht, sech verstoppt,...

A wat maache mir mat eise Richglieser? De Firwëtz ass gestëppelt; mir setzen eis an de Krees a lauschtere ganz gespaant. De „Geschichtenzauber“ ass do: - et war eng Kéier eng Fréijorsprinzessin... hire Numm ass Tuttibella. Sie kann zauberen an sie huet allerlee Parfum an eise Fréijorsbësch gezaubert. Mir richen, mir maachen d’Hänn rondrëm d’Glas, halen eis Nues driwwer a richte ganz bewusst a konzentréiert: frësch gréngt Gras, Bëschanemon, Huesebrout,...

All Parfum seet mir eppes: Huesebrout ass sauer, bei der Bëschanemon denken ech un Hunneg, d’Brennesselsblieder si schaarf wéi Pfeffer, d’Pissblumm mëcht et batter am Mond, d’Blieder vun Hielender sténken, dat frëscht Gras ass gehäertzt, d’Veilercher richte séiss...

Fir eis Spillschoulskanner ass et en Ufank an et ass net sou einfach fir Wieder ze fannen fir dat Richen auszedrécken. Ëmmer neit Ausprobéieren a Widderhuelen hëlleft eis dobäi.

Mat engem weidere Spill léiere mir d’Nimm vun eise Richglieser verhalen. D’Glieder stinn an enger Rei, mir maachen eiss An zou an op de Kommando „wat felt?“ kënnen mir soen, wat fir e Glas eweggeholl ginn ass. A wéi wëll net fir d’éischt de richtege Numm ruffen?

Sou geet dës Fréijorsdag eriwwe, e liewege Schoulmueren, mat villen Andréck a vläicht e puer Erënnerunge fir d’Liewen...